

وصاىة غدر

البعد عمره ما قِدر
يعلم قلوبنا الجفا
والجفا عمره ما فشل
يبعد قلوب عن بعض
وأنا وإنت كنا الضد
أنا كنت لك في الحزن.. أم
إيديها مجروحة
لكنها تططب
تفدي دموع عينك
وتشيل مكانها الهم
وإنت في أحزانها كثر بتتهرب
برافو أوى .. إهرب
متخافش عليها م الوحدة

ولا بلاش الهرب
طلع رصاصة الغدر
وخبيها في الرحمة
وقول في الزحمة
إنك .. محبتهاش
من غير هروب .. إضرب
موت لها القلب الغشيم
إلي في يوم حبك
ومات في حبك عاش
فتَّح عينيها عشان
تشوف سواد قلبك
فتح عنيها عشان
عماها كان ذنبك
عِشَّتْها في الوهم

ورسمت بيه الأحلام
طيرتها في السما
وجاي دلوقتى تقول
دا كله كان أو هام !!
أنا عمري حبيتك ؟
طب قولتلك يعني ؟
قلت كلام كثير ..
قلت كلام كثير
صداه بيوجعني
إوعاك توقف قسا
قول .. قول وسمعني
برغم كل الوجع
كَمَل وفوقني
ولا أقولك أنا !

مش إنت أصلا الي حبيته
ولا إنت الي كنت له بيته
ولا ليك معايا سر جوه البير
أيوه إختلفت كثير
مبقتش متفاجأة..
مش باقي على حاجة؟
أنا بردو مش هبقى !